

Forum za građansko pravo u Bosni i Hercegovini je, na osnovu člana 10. i 12. Zakona o udruženjima i fondacijama Bosne i Hercegovine („Službeni glasnik BiH“, broj 32/01, 42/03, 63/08, 76/11, 94/16), na osnivačkoj Skupštini održanoj u Sarajevu 11.04.2025. godine donio sljedeći

S T A T U T FORUMA ZA GRAĐANSKO PRAVO U BOSNI I HERCEGOVINI

I Opće odredbe

Član 1.

Ovim Statutom, u skladu sa članom 12. Zakona se utvrđuje:

- naziv udruženja, skraćeni naziv i adresa udruženja;
- ciljevi i djelatnosti udruženja;
- postupak za prijem i isključivanje članova;
- tijela udruženja, način na koji se biraju, ovlaštenja koja imaju, kvorum i pravila glasanja, trajanje mandata, osobu ovlaštenu da sazove skupštinu, uvjete i način raspuštanja, odnosno prestanak rada;
- pravila za ostvarivanje, upotrebu i raspolaganje sredstvima udruženja, kao i tijelo koje je ovlašteno za nadzor nad uporabom tih sredstava;
- javnost rada;
- način podnošenja finansijskog izvještaja i izvještaja o radu;
- postupak za izmjenu i dopunu statuta, ovlaštenje i način donošenja drugih općih akata;
- opis oblika i sadržaj pečata i znaka Udruženja;
- zastupanje udruženja;
- uslovi i postupak za spajanje i podjelu udruženja, odnosno prestanak rada uključujući i bilo kakav poseban kvorum ili pravila za postizanje kvalificirane većine u postupku glasanja;
- postupak za raspolaganje preostalim imovinom ili drugim sredstvima u slučaju raspuštanja ili prestanka rada udruženja;
- druga pitanja od značaja za organizovanje rada udruženja.

Član 2.

Forum za građansko pravo u Bosni i Hercegovini (u daljem tekstu: Forum) osniva se kao nezavisna, dobrovoljna, neprofitna, nevladina organizacija u koju su se dobrovoljno udružili i povezali predstavnici pravosudne zajednice i predstavnici akademske zajednice.

II Naziv, sjedište i područje djelovanja

Član 3.

Puni naziv Foruma glasi:

Forum za građansko pravo u Bosni i Hercegovini.

Forum za građansko pravo u Bosni i Hercegovini.

Форум за грађанско право у Босни и Херцеговини.

Naziv Foruma na engleskom jeziku glasi:

Civil Law Forum in Bosnia and Herzegovina.

Naziv Foruma je istovjetan na sva tri jezika koji su u upotrebi u Bosni i Hercegovini.

Skraćeni naziv Foruma je:

Forum za građansko pravo.

Forum za građansko pravo.

Форум за грађанско право.

Službena upotreba naziva je na latiničnom i ćiriličnom pismu.

Član 4.

Sjedište Foruma je: Sarajevo, ulica Kolodvorska broj 12.

Član 5.

Forum je nevladina neprofitna organizacija koja nema namjeru sticati profit.

Forum djeluje na teritoriji Bosne i Hercegovine.

Član 6.

Forum ima svojstvo pravne osobe.

III Oblik sadržaja pečata i znaka Foruma

Član 7.

Pečat Foruma je okruglog oblika prečnika 45 mm u kojem je po obodu ravnomjerno ispisan tekst punog naziva Foruma na latiničnom i ćiriličnom pismu i to: Forum za građansko pravo u Bosni i Hercegovni/ Форум за грађанско право у БиХ i sjedište Foruma: Sarajevo.

Član 8.

Forum ima svoj znak.

Znak ima izgled kruga sa temeljnom bijelom bojom, u čijoj unutrašnjosti se nalazi slika otvorene knjige, akademske kape i sudske vage, pri čemu su knjiga i kapa tamno plave boje, dok je vaga (tasovi) žute boje. Iznad ovog slikovnog prikaza ispisan je tekst plavom bojom na latiničnom i ćiriličnom pismu Forum za građansko pravo u Bosni i Hercegovini/ Форум за грађанско право у БиХ između kojih se nalaze tačke plave boje.

IV Ciljevi i djelatnosti Foruma

Član 9.

Ciljevi i djelatnosti Foruma su :

- Uspostaviti kontinuiranu programsku saradnju i dijalog između akademske i profesionalne zajednice,
- Afirmisati domaću građansko pravnu misao,
- Unaprijediti kvalitet i efikasnost sudske zaštite u građanskim postupcima,
- Unaprijediti sistem edukacije sudija i drugih članova pravosudne zajednice, te podići nivo njihovih praktičnih vještina i teoretskih znanja,
- Unaprijediti kvalitet društvenog dijaloga o reformi sektora prava i pozicionirati se kao aktivan subjekt reforme u procesu pridruživanja Bosne i Hercegovine u Evropsku uniju,
- Dati doprinos ubrzanju zakonodavnih aktivnosti i unaprijediti kvalitet zakonodavne reforme u oblasti građanskog prava,
- Organizuje rad na stručnim i naučnim projektima i izrađuje takve projekte,
- Organizuje i održava stručne i naučne skupove,

- Prati primjenu i inicira donošenje propisa i njihove izmjene i dopune iz građanskog materijalnog i procesnog prava,
- Analizira, obrađuje i predstavlja sudsku praksu i pojave koje su povezane s pravosuđem,
- Aktivno učestvuje u procesu edukacije,
- Objavljuje stručne i naučne publikacije, sa ciljem obavješćavanja članstva Udruženja i šire javnosti o realizaciji ciljeva i djelatnosti Udruženja,
- Sarađuje sa srodnim organizacijama, pravnim fakultetima i drugim naučnim ustanovama u zemlji i inostranstvu, sa pravosudnim organima i sa organima izvršne vlasti nadležnim za pravosuđe, nauku i obrazovanje,
- Preduzima druge aktivnosti koje doprinose unapređenju položaja i uloge sudske vlasti u demokratskom društvu.

V Članstvo u Forumu

Član 10.

Osnivači Foruma su ujedno i članovi Skupštine koji svojstvo člana Foruma stiču danom upisa u Registar udruženja.

Članovi Foruma su fizička lica državljani Bosne i Hercegovine koji su: sudije, stručni saradnici, pripravnici u sudu, univerzitetski profesori, docenti, asistenti, pod uvjetom da prihvataju ciljeve Foruma.

Forum može imati i počasne članove.

Član 11.

Svako ko želi da bude član Foruma pismeno se o tome izjašnjava. Upravni odbor Foruma daje saglasnost na članstvo.

Primljeni član se upisuje u evidenciju članstva.

Forum vodi spisak svojih članova.

Forum vodi evidenciju svojih članova koji sadrži: ime, prezime, adresu članica Foruma; zanimanje, datum pristupanja i broj pristupnice udruženja, vrstu članstva udruženja, datum prestanak članstva, kontakt telefon i e-mail.

Spisak svih članova Foruma će biti dostupan na web stranici Foruma.

Počasni član može postati fizička osoba, koja pokaže značajne rezultate u promociji ciljeva i djelatnosti Foruma.

Prestanak članstva

Član 12.

Članstvo u Forumu prestaje:

1. Na vlastiti zahtjev, potpisivanjem izjave o istupanju iz Foruma.
2. Isključenjem u slučaju djelovanja u suprotnosti sa ciljevima i statuta Foruma.

Član 13.

Svaki član Foruma može slobodno istupiti iz članstva.

Sa odlukom člana Foruma o istupanju iz članstva, upoznaje se predsjednik Foruma, nakon čega se vrši evidentiranje istupanja.

Član 14.

Isključenje iz članstva se vrši u slučaju kada član Foruma teže povrijedi odredbe ovog Statuta ili drugih pravila Foruma ili ako djeluje protivno ciljevima i interesima Foruma i narušava ugled Foruma.

Odluku o prestanku svojstva člana Foruma donosi Upravni odbor Foruma.

Lice koje je nezadovoljno odlukom iz prethodnog stava, može podnijeti žalbu Skupštini Foruma u roku od 15 dana od dana prijema odluke.

Skupština razmatra žalbu iz prethodnog stava na prvoj narednoj sjednici i na istoj donosi konačnu odluku.

VI Prava, dužnosti i odgovornosti članova

Član 15.

Prava članova Foruma su:

1. da biraju organe Foruma i da u njih budu birani,
2. da daju prijedloge, mišljenja i sugestije,

3. da prate rad Foruma i pokreću inicijative za rješavanje pitanja od interesa za Forum,
4. da budu redovno informisani o radu i rezultatima rada.

Član 16.

Dužnosti članova Foruma su:

1. da učestvuju u aktivnostima Foruma,
2. da savjesno i odgovorno izvršavaju povjerene poslove i zadatke u vezi sa radom i aktivnostima Foruma,
3. da propagiraju djelatnost Foruma, a posebno značaj njegovih programskih ciljeva,
4. da redovno izvršavaju preuzete obaveze prema Forumu i provode odluke, stavove i zaključke organa Foruma,
5. da uredno i na vrijeme izmiruju članarinu,
6. da se pridržavaju odredaba ovog Statuta.

VII Organi Foruma, način na koji se biraju, ovlaštenja koja imaju; kvorum i pravila glasanja, trajanje mandata, lice ovlašteno da sazove skupštinu, uslove i način raspuštanja, odnosno prestanak rada

Član 17.

Organi Foruma su:

1. Skupština Foruma,
 2. Upravni odbor Foruma,
 3. Predsjednik Foruma,
 4. Potpredsjednik Foruma,
 5. Sekretar.
-
1. Skupština

Član 18.

Skupština je najviši organ Foruma, koju čine svi članovi Foruma s jednakim pravom glasa.

Član 19.

Skupština Foruma zasjeda kao redovna i vanredna.

Član 20.

Redovna skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Foruma.

Vanredna skupština saziva se izuzetno, u slučaju nepredviđenih teškoća u radu, ili drugih okolnosti kada je ugrožen rad i vitalni interesi Foruma.

Način rada Skupštine pobliže se utvrđuje Poslovníkom o radu Skupštine.

Član 21.

Skupštinu Foruma saziva Upravni odbor, a dužan ju je sazvati kada to zatraže: najmanje 10% članova Foruma ili predsjednik Foruma.

Upravni odbor dostavlja pismeno obavještenje o vremenu i prijedlogu dnevnog reda, na e – mail adresu članova Foruma.

Zasjedanja skupštine Foruma mogu biti i online.

Na samom početku rada sjednice Skupštine Foruma, članovi između sebe biraju predsjedavajućeg Skupštine Foruma.

Član 22.

Radom sjednice Skupštine rukovodi predsjedavajući Skupštine.

Skupština bira zapisničara na početku rada sjednice koji vodi zapisnik.

Zapisnik mora da odražava bitan tok rada i suštinu svih odluka i stavova.

Predsjedavajući Skupštine:

- Predlaže dnevni red sjednice,

- Predsjedava sjednicama Skupštine,
- Potpisuje akte donesene na Skupštini,
- Stara se o izvršenju odluka, zaključaka i drugih akata Skupštine.

Član 23.

Skupština radi i odlučuje u skladu sa Statutom i Poslovnikom o radu, a kvorum je nadpolovična većina svih članova Skupštine Foruma.

Skupština punovažno odlučuje nadpolovičnom većinom prisutnih članova Skupštine Foruma.

Glasanje na sjednici je javno.

Član 24.

Skupština u svojoj nadležnosti donosi:

- Statut Foruma, njegove izmjene i dopune,
- odlučuje o spajanju, podjeli i prestanku rada Foruma, kao i o drugim statusnim promjenama Foruma,
- donosi Poslovnik o radu Skupštine,
- bira i razrješava članove Upravnog odbora,
- usvaja godišnji program i plan rada Foruma,
- usvaja izvještaje o radu i finansijski izvještaj koji je pripremio Upravni odbor Foruma,
- odlučuje o visini i načinu plaćanja članarine,
- usvaja završni račun,
- daje autentično tumačenje ovoga Statuta,
- razmatra i usvaja izvještaje o radu Foruma koje podnosi Upravni odbor Foruma,
- odlučuje o proglašenju počasnih članova Foruma,

- donosi odluku o žalbi isključenog člana iz Foruma,
- druge poslove koji nisu stavljani u nadležnost drugih organa Foruma,
- donosi odluku o prestanku rada Foruma.

2. Upravni odbor

Član 25.

Upravni odbor je izvršni organ Foruma i broji 9 (devet) članova.

Upravni odbor Foruma ima predsjednika i dva potpredsjednika koji se rotiraju svakih 12 (dvanaest) mjeseci.

Članove Upravnog odbora bira i razrješava Skupština Foruma.

Mandat članova Upravnog odbora traje 3 (tri) godine sa mogućnošću reizbora.

Upravni odbor se sastaje najmanje 4 (četiri) puta godišnje.

Dnevni red predlaže predsjednik Upravnog odbora Foruma.

Kvorum za održavanje sjednice Upravnog odbora je nadpolovična većina svih članova Upravnog odbora.

Upravni odbor donosi odluke nadpolovičnom većinom ukupnog broja članova Upravnog odbora.

Predsjednik Upravnog odbora Foruma saziva sjednice Upravnog odbora i istom predsjedava.

Pored članova Upravnog odbora Foruma, sjednicama mogu prisustvovati i druge osobe koje su vezane za realizaciju određenih zadataka, ali bez prava odlučivanja.

Predsjednik Upravnog odbora je ujedno i predsjednik Foruma.

Sjednice Upravnog odbora mogu biti i online.

Član 26.

Upravni odbor Foruma obavlja slijedeće poslove:

- priprema nacrt Statuta, njegove izmjene i dopune i druge akte koje donosi Skupština,
- provodi utvrđenu politiku, zaključke i druge odluke koje donosi Skupština,
- upravlja imovinom Foruma,
- utvrđuje i predlaže finansijski plan za ostvarivanje, korištenje i raspolaganje sredstvima Foruma, koje donosi Skupština,
- daje prijedloge, mišljenja i inicijative za ostvarivanje ciljeva i djelatnosti Foruma,
- podnosi godišnji i periodični izvještaj o svom radu Skupštini na razmatranje i usvajanje,
- bira predsjednika i potpredsjednika Foruma;
- obrazuje komisije, odbore i stručne timove radi realizacije postavljenih ciljeva i djelatnosti Foruma;
- uređuje godišnji i polugodišnji obračun o izvršenju plana prihoda i rashoda Foruma,
- poduzima mjere i aktivnosti na ostvarenju programa rada Foruma,
- priprema sjednice Skupštine,
- priprema analize, informacije i druge materijale za Skupštinu,
- pravi provedbu finansijskog plana rada Foruma i donosi odluke o upotrebi sredstava,
- obavlja i druge poslove u skladu sa Zakonom i ovim Statutom ili ukoliko to odredi Skupština Foruma.

Član 27.

Upravni odbor i svaki njegov član pojedinačno su odgovorni za svoj rad Skupštini Foruma.

Član 28.

Članovi Upravnog odbora mogu biti opozvani i prije isteka mandata na koji su izabrani i to:

- na sopstveni zahtjev,
- ako ne prisustvuju sjednicama tri puta uzastopno, bez opravdanog razloga,

- ako svojim radnjama u vezi sa radom Upravnog odbora ruše ugled Foruma;
- u drugim slučajevima predviđenom Zakonom i aktima Foruma.

O opozivu člana Upravnog odbora odlučuje Skupština, natpolovičnom većinom glasova prisutnih članova Skupštine.

Član 29.

Predsjednik Upravnog odbora Foruma:

- saziva sjednice Upravnog odbora samoinicijativno ili na zahtjev najmanje tri člana Upravnog odbora i rukovodi njegovim radom,
- stara se o provođenju programa rada, odluka, zaključaka i smjernica Skupštine,
- stara se o provođenju plana rada Upravnog odbora,
- sačinjava godišnji i polugodišnji izvještaj o svom radu i podnosi ga Upravnom odboru na razmatranje i usvajanje,
- potpisuje akte koje donosi Upravni odbor,
- održava stalne kontakte sa javnošću i promovira ciljeve Foruma,
- vrši i druge poslove koje mu odredi Skupština i Upravni odbor Foruma.

Član 30.

Upravni odbor može, radi efikasnijeg i racionalnijeg izvršavanja svojih poslova i zadataka, posebnom odlukom obrazovati komisije, radna tijela, odbore, stručne timove, sekcije i sl. Odlukom iz prethodnog stave utvrđuje se sastav, djelokrug, broj članova i način ostvarenja odgovornosti ovih radnih tijela.

Član 31.

Upravni odbor donosi Poslovnik o svom radu. Poslovnikom će se detaljno urediti prava, obaveze i odgovornosti, način rada, glasanja i donošenja odluka Upravnog odbora.

Zasjedanja Upravnog odbora mogu biti i online.

3. Predsjednik/potpredsjednik Foruma

Član 32.

Predsjednika i potpredsjednika Foruma imenuje i razrješava Upravni odbor na mandatni period od (4) četiri godine sa mogućnošću reizbora.

Predsjednik obavlja slijedeće poslove:

- zastupa Forum u pravnom prometu,
- rukovodi radom Foruma i organizira rad,
- odgovoran je za zakonitost rada Foruma,
- odlučuju o upotrebi sredstava za realizaciju ciljeva i djelatnosti Foruma,
- naredbodavac je u izvršenju finansijskog plana Foruma,
- stara se o izvršenju odluka, zadataka i zaključaka Skupštine i Upravnog odbora Foruma,
- podnosi izvještaj o radu Skupštini,
- priprema i predlaže nacrt budžeta za rad Foruma, Upravnom odboru i Skupštini,
- stara se o pravilnom korištenju imovine Foruma o urednom obavljanju materijalno finansijskog poslovanja, zakonitom i blagovremenom vršenju stručnih i administrativnih poslova,
- koordinira rad organa Foruma i donosi odluke o pitanjima rada Foruma, osim onih koji su u isključivoj nadležnosti Skupštine i Upravnog odbora Foruma,
- obavlja i druge poslove koje je povjerilo Upravni odbor i Skupština Foruma.

Predsjednik može biti razriješen dužnosti i prije isteka roka na koji je izabran:

- na vlastiti zahtjev,
- ukoliko njegovo postupanje nije u skladu sa zaključcima i smjernicama Skupštine,
- ako se utvrdi da djeluje suprotno zakonu ili Statutu,
- ako svojim djelovanjem i istupanjem šteti ugledu Foruma.

Odluku o razrješenju Predsjednika donosi Upravni odbor većinom prisutnih članova.

U slučaju sprečenosti Predsjednika Forum zastupa Potpredsjednik.

4. Sekretar

Član 33.

Sekretar se bira iz reda članova Skupštine.

Sekretara bira Skupština na period od (4) četiri godine.

Sekretar neposredno učestvuje u pripremi sjednica svih organa Foruma, te sprovodi odluke Foruma.

Sekretar obavlja administrativno-tehničke poslove u Forumu.

VIII Obavljanje stručnih, finansijskih, pravnih i administrativnih poslova

Član 34.

Obavljanje stručnih, finansijskih, pravnih i administrativnih poslova, Upravni odbor može povjeriti stalnim ili povremeno angažovanim profesionalnim licima ili stručnoj službi drugih organizacija, zajednica ili udruženja.

IX Prihodi i imovina

Član 35.

Prihodi Foruma su:

- članarine,
- dobrovoljni prilozi i pokloni fizičkih i pravnih lica, kako stranih, tako i domaćih u gotovini, uslugama ili imovini bilo koje vrste,
- prihodi od kamata, honorara i sličnih izvora pasivnih prihoda,
- donacije i ugovori sa državom, javnim institucijama, fizičkim i pravnim licima, kako domaćim tako i inostranim,
- prihod stečen kroz ostvarivanje ciljeva i aktivnosti Foruma,

- iz drugih zakonom dozvoljenih izvora.

Član 36.

Ostvarivanje, korištenje i raspolaganje sredstvima Foruma utvrđuje se finansijskim planom kojeg donosi Skupština na prijedlog Upravnog odbora Foruma.

O korištenju sredstava, u skladu sa finansijskim planom odlučuje Upravni odbor Foruma.

Član 37.

Nadzor nad korištenjem sredstava vrši Skupština Foruma.

Skupština je nadležna za kontrolu svih dokumenata, koji se odnose na finansijsko poslovanje, posebno periodičnih, polugodišnjih i završnih finansijskih izvještaja. Finansijski izvještaj Forum je dužan čuvati najmanje pet godina, osim ako posebnim propisom nije utvrđen duži period čuvanja. Dokumenti iz prethodnog stava Skupština razmatra na redovnoj godišnjoj, a ako je potrebno i vanrednoj sjednici Skupštine te iste podnosi nadležnim organima u skladu sa Zakonom i drugim propisima i ovim Statutom. Forum je dužan da uredno vodi poslovne knjige u skladu sa opšte prihvaćenim računovodstvenim principima i da sastavlja finansijske izvještaje u skladu sa relevantnim zakonima. Forum je dužan dostaviti Finansijski izvještaj nadležnom organu prema sjedištu Foruma i Ministarstvu pravde BiH radi objave na internetskoj stranici Ministarstva, a najkasnije do 30. aprila tekuće godine za prethodnu poslovnu godinu.

X Javnost rada

Član 38.

Rad Foruma je javan.

Javnost rada ostvaruje se neposrednim informisanjem i putem sredstava javnog informisanja za značajnije aktivnosti.

Svim članovima omogućit će se neometan uvid u obavljanje aktivnosti na svim područjima na kojima djeluje ovaj Forum, kao i planiranje daljnjih aktivnosti.

Forum mora učiniti dostupnim javnosti sve informacije koje se tiču rada i djelovanja Foruma, u skladu s pozitivnim zakonodavstvom.

Član 39.

Članovi Foruma moraju biti redovno informisani o radu Foruma. Za javnost rada Foruma odgovoran je Predsjednik. Forum ima svoju zvaničnu web stranicu i e- mail.

XI Postupak za izmjenu i dopunu statuta

Član 40.

Skupština je nadležna za donošenje Statuta, izmjene i dopune Statuta i drugih općih akata određenih Statutom.

Izmjene i dopune Statuta odnosno novi Statut Foruma usvaja Skupština, dvotrećinskom većinom glasova ukupnog broja članova.

Inicijativu za izmjene i dopune Statuta može podnijeti $\frac{1}{2}$ aktivnih članova Foruma.

Inicijativu se upućuje Upravnom odboru Foruma koji priprema tekst nacрта za izmjene i dopune statuta.

Član 41.

Forum može pored Statuta imati i druga opća akta.

Organi Foruma donose opće akte Foruma, pravilnike, poslovnike, odluke, programe, strategije. Sve opće akte Foruma koji nisu u izričitoj nadležnosti Skupštine donosi Upravni odbor Udruženja.

XII Spajanje, podjela i prestanak rada Foruma

Član 42.

Forum se može spojiti u drugo udruženje i podijeliti u skladu sa Zakonom.

Odluku iz prethodnog stava donosi Skupština dvotrećinskom većinom svih članova Skupštine Foruma.

Ovom odlukom regulira se naročito: naziv, sjedište, djelatnost, podjela imovine, prava i obaveze kao i druga pitanja u vezi statusnih promjena Foruma.

Član 43.

Forum može prestati sa radom dobrovoljno na osnovu odluke Skupštine ili po sili zakona. Inicijativu za prestanak rada Foruma može dati $\frac{1}{3}$ članova Foruma, u slučaju:

- ako je proteklo dvostruko više vremena od vremena za održavanje Skupštine utvrđenog ovim Statutom, a Skupština Foruma nije održana,

- da se broj članova Foruma smanji ispod broja tri, a nadležni organ Foruma u roku od tri mjeseca od nastupanja ove okolnosti ne donese odluku o prijemu novih članova Foruma.

Odluku o dobrovoljno prestanku rada donosi Skupština Foruma dvotrećinskom većinom svih aktivnih članova Skupštine Foruma. Istovremeno Skupština donosi plan likvidacije Foruma, kojim se utvrđuje raspored imovine, prava i obaveze Foruma u skladu sa Zakonom i ovim statutom, s tim što je prethodno obavezno izmiriti zakonske i ugovorne obaveze.

Skupština imenuje likvidatora Foruma čija dužnost je da sastavi Plan likvidacije i isti dostavi Skupštini na usvajanje.

Preostala imovina, nakon podmirenja obaveza iz prethodnog stava, će se dodijeliti drugom registrovanom udruženju, koje obavlja istu ili sličnu statutaru djelatnost, a na osnovu odluke Skupštine Foruma.

XIII Zastupanje

Član 44.

Forum zastupaju pojedinačno i samostalno Predsjednik Foruma i Potpredsjednik, u okviru ovlaštenja utvrđenim ovim Statutom i Zakonom.

XIV Prelazne i završne odredbe

Član 45.

Na sva pitanja koja nisu uređena ovim statutom primjenjuju se odredbe Zakona o udruženjima i fondacijama Bosne i Hercegovine.

XV Stupanje na snagu Statuta

Član 46.

Ovaj statut stupa na snagu odmah po usvajanju od strane Skupštine i objavljivanju na internet stranici Foruma.

Broj: 02/25

Predsjedavajući osnivačke Skupštine Foruma

Ime i prezime i svojeručni potpis

dr. sc. Adnan Baručija

Sarajevo, 11.04.2025. godine
